



93-06-2011

BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
SARAJEVO

PRIMLJENO: 03.06.2011			
Organizaciona jedinica	Klasifikaciona oznaka	Redni broj	Broj priloga
01,02-04-485/11			

B

Broj: 01-6-04-10-1527-1/11
Datum: 02.06.2011.godine

**BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE**

**Predmet: Informacija o stanju sigurnosti u Bosni i Hercegovini u 2010. godini
dostavlja se,-**

U prilogu akta dostavljamo **Informaciju o stanju sigurnosti u Bosni i Hercegovini u 2010.godini**, razmatranu i usvojenu na 151. sjednici Vijeća ministara Bosne i Hercegovine, koja je održana 25.05.2011.godine.

Informaciju o stanju sigurnosti u Bosni i Hercegovini u 2010. godini dostavljamo, u tri jezičke varijante, radi uvrštavanja na dnevni red naredne sjednice Parlamentarne skupštine Bosne i Hercegovine.

S poštovanjem,



Prilog:
-Informacija X3



BOSNA I HERCEGOVINA
Ministarstvo sigurnosti

BOSNA I HERCEGOVINA
Ministarstvo bezbjednosti

JANUAR – DECEMBAR 2010. GODINE

Informacija o stanju sigurnosti u Bosni i Hercegovini

Ministarstvo sigurnosti Bosne i Hercegovine

Odsjek za politike i planove

Uvod

Informacija o stanju sigurnosti u BiH u 2010. godini je urađena u Odsjeku za politike i planove Ministarstva sigurnosti BiH kao obaveza Ministarstva iz godišnjeg plana rada Vijeća ministara BiH za 2011. godinu.

Kao izvori statističkih podataka i sigurnosnih ocjena korišteni su podaci MUP-a Republike Srpske, Federalnog MUP-a (FMUP), Policije Brčko Distrikta BiH, Državne agencije za istrage i zaštitu BiH (SIPA-e), Granične policije BiH, Službe za poslove sa strancima BiH, Direkcije za koordinaciju policijskih tijela – Sektora sa međunarodnu operativnu policijsku saradnju (nekadašnji ured Interpola u Sarajevu), Obavještajno-sigurnosne agencije (OSA) BiH i Uprave za indirektno oporezivanje BiH.

Lista sigurnosnih prioriteta proizišla je iz realnog sigurnosnog stanja u BiH i usklađena je s redoslijedom glava Posebnog dijela Krivičnog zakona BiH, Krivičnog zakona Federacije BiH, Krivičnog zakona Republike Srpske i Krivičnog zakona Brčko Distrikta BiH. Takođe, usklađena je i sa postojećom procjenom prijetnji organiziranog kriminala za regiju Jugoistočne Evrope (OCTA, SEE) za 2010. godinu, s naglaskom na organiziranu i međunarodnu dimenziju krivičnih djela od interesa za Bosnu i Hercegovinu.

Sigurnost u Bosni i Hercegovini u periodu januar-decembar 2010. godine može se ocijeniti zadovoljavajućom, na što ukazuje i niz sigurnosnih indikatora (vidjeti u razradi Informacije). Aktuelno sigurnosno stanje u BiH karakterizira smanjenje broja izvršenih krivičnih djela, kako općeg tako i organiziranog kriminala, smanjenje procenta učešća djela organiziranog kriminala u ukupnom kriminalitetu, te manje povećanje broja prekršaja u oblasti javnog reda i mira, uz manji pad fizičkih napada na tijelo druge osobe s teškom tjelesnom ozljedom (15, u 2009. godini 25).

Djelovanje Ministarstva sigurnosti BiH odvijalo se i u 2010. godini u okvirima zakonskih nadležnosti i ovlaštenja i u skladu sa godišnjim Programom rada u kojem su jasno definirani prioriteti po pojedinim oblastima.

Sadržaj

Uvod	1
2.1. Granična sigurnost.....	1
2.1.1 Migracije.....	1
2.1.2. Prekogranični kriminal.....	4
2.2. Stanje općeg kriminaliteta.....	5
2.2.1. Organizirani kriminal.....	6
3. Krivična djela protiv slobode i prava čovjeka i građanina.....	10
3.1. Izazivanje nacionalne, rasne i vjerske mržnje, razdora i netrpeljivosti.....	10
3.2. Oštećenje ili rušenje vjerskih objekata.....	11
3.3. Sprječavanje povratka izbjeglica i raseljenih osoba.....	11
4. Krivična djela protiv integriteta Bosne i Hercegovine.....	12
4.1. Napad na ustavni poredak i ugrožavanje teritorijalne cjeline.....	12
5. Krivična djela protiv čovječnosti i vrijednosti zaštićenih međunarodnim pravom.....	13
5.1. Saradnja sa Haškim tribunalom i procesuiranje ratnih zločina.....	13
5.2. Krijumčarenje migranata i trgovina ljudima	13
5.3. Ugrožavanje osoba pod međunarodnom zaštitom.....	15
5.4. Nedozvoljeno držanje oružja ili eksplozivnih materija i trgovina oružjem i vojnom opremom.....	16
5.5. Neovlaštena proizvodnja i stavljanje u promet opojnih droga.....	18
5.6. Terorizam.....	24

6. Krivična djela protiv privrede i jedinstva tržišta	
te krivična djela iz oblasti carina.....	26
6.1. Pranje novca.....	27
6.2. Krijumčarenje robama i nedozvoljena trgovina.....	28
6.3. Krivična djela protiv sistema elektronske obrade podataka.....	29
6.4. Ilegalna proizvodnja, nabavljanje i stavljanje u promet	
falsificiranih novčanica.....	29
6.5. Falsificiranje ličnih dokumenata.....	30
7. Krivična djela povrede autorskih prava.....	32
8. Krivična djela protiv imovine.....	32
8.1. Razbojništva.....	33
8.2. Krađa i preprodaja ukradenih vozila.....	34
9. Organizirane kriminalne grupe i međunarodna policijska saradnja.....	36
10. Javni red i mir.....	36
11. Mjere i radnje u periodu narednih šest mjeseci 2011. godine.....	37

1 Detaljne analize po pojedinim segmentima sektora sigurnosti

2.1 Granična sigurnost

2.1.1. Migracije (sigurnosni aspekti)

U 2010. godini nastavljen je trend smanjenja prometa osoba i transportnih sredstava preko državne granice. Ovo smanjenje je najvjerojatnije uzrokovano svjetskom finansijskom i ekonomskom krizom.

Pojačane su granične provjere na graničnim prijelazima. Otkriveno je 727 osoba za kojima su od strane nadležnih organa u BiH ili Interpol-a raspisane potjernice, što je za 6,29% više u odnosu na prethodnu godinu. Međutim, i dalje je evidentan problem u nedovoljnoj ažurnosti podataka o obustavama potraga jer je od ukupnog broja, u trenutku kontrole pripadnika Granične policije BiH, njih 34,11% u međuvremenu obustavljeno.

Prilikom kontrole prelaska državne granice otkrivena je 261 osoba za koje je utvrđeno da su im od strane sudova izrečene mjere zabrane prelaska državne granice, za koje je od nadležnih organa zatraženo oduzimanje putne isprave ili dostavljanje informacije o prelasku državne granice. Takođe, registrirano je 796 prelazaka državne granice sigurnosno interesantnih osoba sa „watch“ liste, što je više za 260 ili 48,51% u odnosu na prethodnu godinu. Informacije o prelasku državne granice sigurnosno interesantnih osoba prosljeđene su nadležnim policijskim i sigurnosnim agencijama.

U protekloj godini registrirano je **povećanje prometa preko granice državljana visokog migracijskog rizika za 1,18% u odnosu na 2009. godinu (2009. godine 77.514 osoba, 2010. godine 78.429 osoba).** I pored toga, **smanjila se ukupna razlika između ulaska i izlaska državljana ovih država sa 2.428 na 703.** Ovo smanjenje razlike broja ulaz/izlaz se posebno odnosi na državljane Turske i Srbije(Kosovo), a povećanje razlike, u odnosu na prošlu godinu, uočeno je kod državljana Indije, Libana, Tunisa i Moldavije, dok su kod državljana Kine, Sirije, Avganistana i Armenije brojniji izlasci iz BiH nego ulasci.

Došlo je do **značajnog smanjenja broja odbijenih ulazaka u BiH za 1.589 osoba ili 31,14%.** Najčešći razlozi odbijanja su **neposjedovanje važeće putne isprave i neposjedovanje vize za ulazak, boravak i prelazak.** Broj odbijenih ulazaka u BiH državljanima susjednih zemalja iznosi **52,99% od broja odbijenih ulazaka u BiH** (Hrvatske 935 ulazaka, Srbije 714 i Crne Gore 213). Sa sigurnosnog aspekta potrebno je naglasiti smanjenje broja odbijenih prelazaka za državljane Albanije (smanjenje za 34,40%) zbog ukidanja viznog režima.

Nastavljen je trend smanjenja ilegalnog prelaženja državne granice. Otkrivene su 322 osobe što je za 15,49% manje nego u 2009. godini, s tim da od ukupnog broja otkrivenih ilegalnih prelazaka 54,35% otpada na granicu sa Republikom Hrvatskom. Ovo smanjenje je, pored mjera Granične policije, rezultat provođenja zajedničkih patrola sa graničnim policijama Republike Hrvatske, Republike Srbije i Crne Gore.

Broj izdatih viza na graničnim prijelazima smanjen je za 5,22% u odnosu na 2009. godinu. Treba naglasiti da je najveći dio viza izdat na Međunarodnom aerodromu Sarajevo (278 ili 85,02% od ukupnog broja) i da se osobe kojima su izdate vize nisu pojavljivale u prihvatu po sporazumima o readmisiji.

Tokom 2010. godine, u skladu sa potpisanim međunarodnim sporazumima o prihvatu osoba, prihvaćene su 792 osobe, što u odnosu na prethodnu godinu predstavlja povećanje za 21,66%; izvršena je i readmisija iz BiH 14 stranaca (u 2009. pet).

Po Sporazumu sa Republikom Hrvatskom o saradnji u predaji i prihvatu osoba čiji je boravak protivzakonit, prihvaćeno je 259 osoba zbog nezakonitog ulaska i boravka u Republici Hrvatskoj (u 2009. godini 311), a koji su na teritoriju Hrvatske ušli iz BiH, što predstavlja smanjenje za 16 osoba ili 5,14%. Od tog broja 119 su strani državljani, što je smanjenje njihovog prihvata u odnosu na 2009. godinu za 2,46%.

Prema Sporazumu sa Republikom Srbijom o readmisiji, izvršen je prihvati tri državljanina BiH, dok je iz Crne Gore prihvaćeno osam osoba, pet državljana BiH i tri državljana Srbije, te izvršena readmisija u Crnu Goru dva njezina državljanina. U skladu sa potpisanim sporazumima o readmisiji sa zemljama EU i drugim zemljama, preko Međunarodnog aerodroma Sarajevo izvršen je prihvati po raznim osnovama 486 državljana BiH.

Sa sigurnosnog aspekta značajno je navesti povećanje broja prihvaćenih državljana Albanije (59) u odnosu na prethodnu godinu (26), kao i da su u 2010. godini evidentirana četiri državljana Avganistana kojih u prethodnoj godini nije bilo. Pored toga, u prošloj godini je, u odnosu na prethodnu godinu, evidentirano povećanje broja deportovanih **državljana Albanije (100)** i porast broja ovih osoba među stranim državljanima predatim u nadležnost drugih organa u BiH, uz podatke da su u ovom periodu među osobama otkrivenim u ilegalnom prelasku državne granice evidentirani **državljeni Avganistana (12)** kao i da ih u 2009. godini nije bilo među deportovanim strancima, **ukazuje na migracioni pritisak ovih osoba.**

U 2010. godini nadležnim organima u BiH predat je 321 strani državljanin, što je u odnosu na prethodnu godinu povećanje za 14,23%. Od tog broja, 279 osoba ili 86,92% predati su Službi za poslove sa strancima BiH a ostali drugim organima.

U prošloj godini Granična policija BiH je evidentirala **493 strana državljana koji su deportovani iz BiH što je u odnosu na prethodnu godinu povećanje za 24,81%**. Razlozi za deportaciju su bili: ilegalni boravak u BiH (u 67,75%), izvršenje teških krivičnih djela (4,26%), zbog zloupotrebe opojnih sredstava (0,61%) i drugo. Najviše je deportovano državljana Srbije (269), Hrvatske (22), Palestinaca (16) i dr.

Granična policija je nadležnim tužilaštvima u BiH dostavila **202** službena izvještaja zbog postojanja osnova sumnje da je na graničnim prijelazima i u graničnom pojasu počinjeno **208** krivičnih djela za koja je prijavljeno **248** osoba, što je smanjenje u pomenutim segmentima u odnosu na prethodnu godinu.

Projekat **zaprečavanja lokacija pogodnih za ilegalni prelazak kopnene granice** motornim vozilima između BiH i Republike Hrvatske (realiziran u 2008. godini) **doprinosi povoljnijem stanju na granici a nadzor nad postavljenim preprekama vrši se kontinuirano. Trenutno su u toku aktivnosti**

na Projektu zaprečavanja lokacija pogodnih za ilegalni prelazak kopnene granice motornim vozilima između BiH i Crne Gore. Određene su 44 lokacije za zaprečavanje, od kojih je 21 lokacija na području JGP Hum a 23 u nadležnosti JGP Trebinje. Postignut je dogovor oko podjele lokacija i nadležnosti za izvođenje radova na njihovom zaprečavanju.

Služba za poslove sa strancima prvenstveno se bavila nadzorom i kontrolom nad kretanjem i boravkom stranaca u Bosni i Hercegovini, kroz obavljanje administrativno-upravnih i inspekcijskih poslova. Izvršila je 362.797 prijava-odjava-promjene adrese boravišta i prebivališta stranih državljana, što je povećanje od 5,44% u odnosu na 2009. godinu. Kontinuiranim operativnim radom inspektora za strance na terenu kao i čestim inspekcijskim kontrolama fizičkih i pravnih osoba koji pružaju usluge smještaja strancima, prijava-odjava boravišta je u dobroj mjeri stavljena pod kontrolu. Tokom 2010. godine, pored redovnih inspekcijskih kontrola (6.050), izvedene su veće koordinirane inspekcijske kontrole kretanja i boravka stranaca na područjima Kantona Sarajevo i Istočnog Sarajeva, te na području Tuzlanskog kantona (operacija „Svjetlost“).

Rješavajući po zahtjevima za odobrenje-produženje privremenog boravka u protekloj godini, privremeni boravak odobren je u 3.383 slučaja i produžen u 4.748 slučajeva, što ukupno iznosi 8.131 odobreni-produženi privremeni boravak i predstavlja uvećanje od 8,24% u odnosu na 2009. godinu. Kada su u pitanju osnovi za odobrenje-produženje privremenog boravka, najviše stranih državljana u BiH ima odobren privremeni boravak po osnovu braka sa državljaninom BiH, rada po osnovu izdate radne dozvole, obrazovanja, spajanja porodice i volonterskog rada.

U 2010. godini broj podnesenih zahtjeva za odobrenje stalnog boravka iznosio je 318, od toga je u 315 slučajeva odobren a u tri slučaja odbijen zahtjev za odobrenje stalnog boravka, što je umanjeње od 13,82% u odnosu na 2009. godinu.

Stalni boravak u 2010. godini u najvećem procentu odobren je državljanima Kine, zatim Makedonije, Republike Hrvatske, Turske, Crne Gore i dr.

Prilikom inspekcijskih kontrola Službe za poslove sa strancima izvršeno je preduzimanje određenih mjera prema strancima u 1.359 slučajeva i to: doneseno je 207 rješenja o otkazu bezvignog boravka, 190 rješenja o otkazu privremenog boravka, 106 rješenja o otkazu stalnog boravka, 73 rješenja o otkazu bezvignog boravka sa izrečenom mjerom protjerivanja, 410 rješenja o protjerivanju stranaca iz BiH, dok je za 354 osobe rješenjem određena mjera stavljanja pod nadzor (od čega je 312 osoba smješteno u Imigracioni centar, dok su 42 osobe smještene pod nadzor u mjestu boravišta, što je porast u odnosu na 2009. godinu.

Mjere protjerivanja stranim državljanima najviše su izricane iz razloga što su prekršili propise o prelasku državne granice, osobama prihvaćenim na osnovu sporazuma o readmisiji, osobama pravosnažno osuđenim za krivična djela, osobama koje predstavljaju prijetnju javnom poretku ili sigurnosti BiH, kao i drugih razloga. Najveći broj izrečenih mjera protjerivanja odnosio se na državljane Srbije, Albanije, Turske, Crne Gore i Hrvatske.

Kada je riječ o otkazu boravka, najviše navedenih mjera doneseno je prema državljanima Republike Srbije, zatim Kine, Republike Hrvatske, Republike Turske i dr. **Otkaz boravka je najčešće**

izrican zbog rada bez posjedovanja radne dozvole kao i zbog bitno izmijenjenih činjenica na osnovu kojih je boravak odobren.

Sa sigurnosnog aspekta važno je napomenuti da je u toku 2010. godine u Imigracionom centru pod nadzor smješteno ukupno 312 neregularnih migranata s ciljem preduzimanja daljih mjera a u skladu sa Zakonom o kretanju i boravku stranaca i azilu BiH. Najviše neregularnih migranata bilo je iz Republike Srbije, Albanije, Turske, zatim Avganistana i Hrvatske.

U Imigracionom centru pod nadzorom boravi pet osoba koje su od strane obavještajno- sigurnosne agencije okvalificirane kao osobe čije prisustvo predstavlja prijetnju javnom poretku ili sigurnosti BiH, i gdje se trenutno provode dalje mjere iz nadležnosti ove Službe.

Služba za poslove sa strancima je omogućila da se boravak stranaca u Imigracionom centru odvija u skladu sa propisanim pravilima o funkcioniranju Centra, kućnom redu, uz poštivanje dostojanstva ličnosti i međunarodnih konvencija i propisa koji reguliraju zaštitu ljudskih prava.

Posredstvom **Ureda Interpola Sarajevo** u toku prvog polugodišta 2010. godine izvršeno je osam transfera osoba- deportiraca i osuđenika, kako deportacija osoba iz drugih zemalja (članica Interpola) u BiH tako i iz BiH u drugu zemlju- članicu Interpola.

2.1.2. Prekogranični kriminal- saradnja zemalja Regiona

Ured Interpola Sarajevo u 2010. godini je obradio 266 predmeta iz ove problematike. Od tog broja, **241 predmet je eksterni (zahtjevi SECI Centra i NCB-a država članica Interpola- posebno zemalja iz Regiona) a 25 predmeta zaprimljeno je i obrađeno na zahtjeve domaćih agencija i službi za provođenje zakona.**

Od ukupnog broja obrađenih predmeta najveći dio odnosio se na svakodnevne razmjene operativnih podataka i dostave određenih informacija, provjere i utvrđivanja identiteta osoba. Kroz dnevnu razmjenu podataka obrađivani su predmetni akti koji se odnose na policijske i carinske zahtjeve, zatim razmjenu informacija u okviru Balkan- info sistema te razne druge vrste informacija. Informacije su se pretežno odnosile na operativne detalje falsificiranja novca, zatim na modus operandi u okviru ilegalnih imigracija i seksualne eksploatacije djece, **kao i na detalje o saznanjima i informacijama u Evropskoj uniji o potencijalnim terorističkim prijetnjama.** Svi ovi predmeti i informacije s njima u vezi proslijeđene su Agenciji za istrage i zaštitu BiH, Graničnoj policiji BiH, Federalnom MUP-u, MUP-u Republike Srpske i Policiji Distrikta Brčko, koji su po njima postupali.

Takođe, u sprječavanju i otkrivanju prekograničnog kriminala, u toku 2010. godine Granična policija BiH je intenzivno sarađivala sa SIPA-om i entitetskim MUP-ovima, što je rezultiralo provođenjem više uspješnih zajedničkih akcija.


Svi prezentirani podaci ukazuju da je Bosna i Hercegovina potpuno posvećena suzbijanju nezakonitih migracija i prekograničnog kriminala, što potvrđuje i broj ekstradicija osoba lišenih slobode na osnovu Interpolovih međunarodnih potjernica koje su raspisane u proteklom periodu. U 2010. godini realizirano je 96 izručenja osoba, od čega 71 ekstradicija osoba iz drugih zemalja članica u BiH, dok je 25 ekstradicija izvršeno iz BiH prema drugim zemljama članicama Interpola.

2.2. Stanje općeg kriminaliteta

Stanje kriminaliteta u Bosni i Hercegovini u 2010. godini karakterizira dalje smanjenje ukupnog broja izvršenih krivičnih djela (za 1,7%), neznatno povećanje broja izvršilaca tih djela (za 0,60%), povoljan procenat ukupne rasvjetljenosti evidentiranih krivičnih djela od 64%, te povećanje registriranih prekršaja iz oblasti javnog reda i mira za 1,75.

Trend smanjenja ukupno izvršenih krivičnih djela na nivou BiH prisutan je već nekoliko godina, tačnije od 2007. godine. To ukazuje, pored ostalog, da se zadržava tendencija u okviru koje nadležni organi u BiH nastavljaju da se ofanzivnije upuštaju u prikupljanje dokaza za privođenje zakonskoj odgovornosti pojedinaca i različitih kriminalnih grupa, koji su u znatnoj mjeri ugrožavali sigurnost u Bosni i Hercegovini u ranijem periodu.

Na narednom grafičkom prikazu su uporedni podaci o kretanju ukupnog broja evidentiranih krivičnih djela od 2007.-2010. godine:



U 2010. godini sve policijske agencije u Bosni i Hercegovini evidentirale su 33.824 izvršena krivična djela što je za 601 djelo ili 1,70% manje nego u istom periodu prethodne godine. U Federaciji BiH evidentirano je 23.217 krivičnih djela, što je za 690 ili 3,10% više; u Republici Srpskoj 9.522 djela, što je za 1.457 ili 13,20% manje, a u Brčko Distriktu BiH 869, što je za 116 djela ili 11,77% manje nego u istom periodu prethodne godine, dok je Granična policija BiH evidentirala 216 krivičnih djela općeg kriminaliteta, što je za 78 djela ili 26,53% manje nego 2009. godine.

U izvršenju ovih djela na nivou BiH registrirano je 24.836 izvršilaca, što je za 0,60% više nego u istom periodu 2009. godine. U Federaciji BiH evidentirano je 16.718 izvršilaca, više za 527 ili 3,25% osoba, u Republici Srpskoj 7.447 izvršilaca, što je manje za 200 ili 2,61% osoba, a u Brčko Distriktu 671 izvršilac- manje za 207 ili 23,57% izvršilaca nego prethodne godine.

U Federaciji BiH, od ukupnog broja prijavljenih osoba, 6.804 ili 40,70% su povratnici u činjenju krivičnih djela, u Republici Srpskoj ostalo je na prošlogodišnjem nivou 2.143 (svaki četvrti); kod učešća maloljetnika u vršenju krivičnih djela u Federaciji BiH registriran je pad od 12,40% dok je u Republici Srpskoj smanjenje za 15,80%. Međutim, u Brčko Distriktu BiH u porastu je maloljetnička delinkvencija, u odnosu na 2009. godinu, za 8,20%.

U 2010. godini u Bosni i Hercegovini registrirano je smanjenje broja ubistava (49) – za 16 ili 24,60% u odnosu na prethodnu godinu, od kojih je skoro pola izvršeno vatrenim oružjem. Činjenica je da je procenat rasvijetljenosti ovih krivičnih djela visok (99%). Registrirano je i 69 ubistva u pokušaju (dvadeset i dva manje nego u 2009. godini).

Smanjen je broj krivičnih djela protiv spolne slobode i morala odnosno protiv spolnog integriteta za 8,44% (u 2010. godini registrirano 141 djelo). Međutim, značajno su u porastu slučajevi silovanja (za 30,23%). Tokom 2010. godine registrirana su 43 takva krivična djela. U 90,7% slučajeva počinioci su otkriveni.

I dalje su najbrojnija krivična djela protiv imovine i na njih otpada 65% svih krivičnih djela općeg kriminala. Specifičnost ovih djela je da je izvršilac u gotovo 80% slučajeva nepoznat, pa je procenat rasvijetljenosti ovih djela po nepoznatom izvršiocu na nivou BiH u toku izvještajne godine oko 38%. Stepen njihovog kasnijeg rasvjetljavanja kroz naknadni operativni rad je oko 33%.

2.2.1. Organizirani kriminal

Organiziranom kriminalu su pogodovali tokovi globalne ekonomske krize u čijem kontekstu se, uvećavanjem broja nezaposlenih i osoba koja nastoje osigurati egzistenciju, uvećava i broj potencijalnih novih učesnika u njegovim različitim formama.


U toku 2010. godine, policijske strukture u BiH kontinuirano su pratile i istraživale djelovanje pojedinaca i grupa koji se dovode u vezu sa svim pojavnim oblicima kriminala koji imaju elemente organiziranog kriminala, a posebno osoba i grupa za koje postoje indicije da se mogu dovesti u direktnu vezu sa izvršenjem ovog oblika kriminala.

Agencije za sprovođenje zakona u BiH registrirale su i prijavile u 2010. godini **310 krivičnih djela iz Krivičnog zakona BiH** koja jesu ili imaju elemente organiziranog kriminala a odnose se na falsificiranje novca, nedozvoljenu proizvodnju i trgovinu opojnim drogama, krijumčarenje i trgovinu ljudima, terorizam, trgovinu oružjem, zloupotrebu položaja i ovlaštenja, carinske prijevare, pranje novca, nedozvoljeno korištenje autorskih prava te na oblast krivičnih djela protiv čovječnosti i vrijednosti zaštićenih međunarodnim pravom. **To je za 31,7% manje takvih djela u odnosu na prethodnu godinu.**

U 2010. godini u padu je i broj djela organiziranog kriminala i onih djela koja imaju elemente organiziranosti iz KZ entiteta i KZ Brčko Distrikta BiH za 9,84%, kao i učešće organiziranog kriminala u ukupnom broju krivičnih djela za 6,58%.

Te tendencije vidljive su na narednim grafikonima na kojima su dati uporedni podaci od 2007. do 2010. godine:

KRIVIČNA DJELA ORGANIZIRANOG KRIMINALA ILI DJELA KOJA IMAJU ELEMENTE TOG DJELA IZ KRIVIČNOG ZAKONA BiH




Iz predhodnog grafikona je uočljiv pad broja krivičnih djela organiziranog kriminala i djela koja imaju elemente organiziranog kriminala iz KZ BiH od 2007. do 2010. godine za 21,10%. To ujedno upućuje na zaključak da je za uspješno suprotstavljanje najtežim oblicima organiziranog kriminala i korupcije potrebno da postoji dobra i kontinuirana saradnja svih agencija za provođenje zakona, kao i njihova saradnja na regionalnom planu i šire.

Borba protiv organiziranog kriminala je pospješavana kroz sklapanje sporazuma o međunarodnoj policijskoj saradnji, kao i primjenjujući evropske konvencije, konvencije Vijeća Evrope, UN konvencije i kroz poboljšanje domaćeg zakonodavstva, ali i kroz konkretnu saradnju prije svega tužilaštava i organa gonjenja u BiH.

Na narednom grafikonu prikazani su uporedni podaci broja registriranih krivičnih djela organiziranog kriminala i djela koja imaju elemente organiziranog kriminala iz KZ entiteta i Brčko Distrikta BiH, iz kojeg se može vidjeti njihov stalni pad : od 2007. do 2010. godine za 36,64% odnosno od 3021 krivičnog djela registriranog 2007. godine do 1914 djela registriranih u 2010. godini.

KRIVIČNA DJELA ORGANIZIRANOG KRIMINALA ILI IMAJU ELEMENTE TOG DJELA IZ KZ ENTITETA I BRČKO DISTRIKTA:




Kontinuirano prateći i istražujući djelovanje pojedinaca i grupa koji se dovode u vezu sa svim pojavnim oblicima kriminala koji imaju elemente organiziranog kriminala, SIPA je u 2010. godini nadležnim tužilaštvima podnijela 69 izvještaja o počinjenim krivičnim djelima protiv 286 osoba, osam pravnih osoba, 11 NN osoba te 18 dopuna izvještaja protiv 103

osobe i tri NN osobe, za koje postoje osnovi sumnje da su počinile krivična djela organiziranog kriminala ili krivična djela koja se mogu dovesti u vezu sa organiziranim kriminalom.

U 2010. godini registrirano je nekoliko međusobnih obračuna suparničkih kriminalnih grupa, u pojedinim slučajevima i uz upotrebu vatrenog oružja, što je unosilo određenu dozu nesigurnosti kod građana, naročito na javnim mjestima (na ulici, u ugostiteljskim objektima i sl.). Ipak, zahvaljujući policijskim mjerama i aktivnostima, većina takvih počinilaca je brzo otkrivena i prema njima su preduzete odgovarajuće zakonske mjere. Tako je Državna agencija za istrage i zaštitu, u sklopu istrage protiv jedne organizirane kriminalne grupe, podnijela Tužilaštvu BiH izvještaj o počinjenom krivičnom djelu protiv 23 osobe i 12 dopuna izvještaja. Navedene osobe se sumnjiče da su kao članovi organizirane kriminalne grupe djelovale na području BiH, regiona i zemalja Zapadne Evrope i izvršili veći broj krivičnih djela, među kojima su nedozvoljeni promet opojne droge, razbojništvo u Kargo centru u Sarajevu te ubistva četiri osobe. Radeći na ovom predmetu, SIPA je lišila slobode 17 osoba a Sud BiH je odredio pritvor za njih 13, dok su preostale osobe nedostupne organima gonjenja i nalaze se u bjekstvu.

Višegodišnja policijska statistik (od 2007. do 2010. godine) pokazuju da iz godine u godinu u BiH opada procenat učešća krivičnih djela koja jesu ili imaju elemente organiziranog kriminala u ukupnom broju krivičnih djela, te da je ta stopa ispod devet odsto. To ilustrativno pokazuje i sljedeći grafikon:

Uporedni pokazatelji ukupnog broja krivičnih djela i djela organiziranog kriminala



S jedne strane, pozitivna je tendencija opadanja broja krivičnih djela u ukupnom broju počinjenih djela u BiH, a, s druge strane, taj trend ukazuje i na pokušaje počinilaca krivičnih djela organiziranog kriminala da se određenom „internom“ selekcijom, grupisanjem i specijalizacijom postigne što veći stepen profesionalizacije unutar njih samih, što od organa gonjenja zahtijeva još veći stepen stručnog usavršavanja u borbi protiv organiziranog kriminala.

3. Krivična djela protiv slobode i prava čovjeka i građanina

3. 1. Izazivanje nacionalne, rasne i vjerske mržnje, razdora i netrpeljivosti

I u 2010. godini u Bosni i Hercegovini su bili prisutni razni oblici ekstremizma sa različitom vjersko-nacionalnom ili političkom pozadinom iz kojih su kao posljedica mogli proisteći ili su proistjecali neki od različitih oblika nasilja, odnosno neka od njihovih početnih faza.

Tokom 2010. godine je na području cijele BiH registriran je određeni broj akata nasilja prema pripadnicima pojedinih nacionalnih, vjerskih ili drugih grupacija ili njihovoj imovini, objektima i obilježjima, ali i drugih incidenata koji su negativno utjecali na međunacionalne odnose i stanje opće sigurnosti građana (oštećenja sakralnih objekata, nadgrobnih obilježja i znamenja svih konfesija u BiH, slučajevi narušavanja javnog reda i mira na nacionalnoj osnovi, aktiviranje eksplozivnih naprava, pisanje i rasturanje uvredljivih nacionalističkih grafita, plakata i naljepnica, slanjem putem Interneta i mobilnih telekomunikacija prijetećih poruka i ekstremno radikalnih stajališta).

Provocirajuće i destruktivno ponašanje jednog broja navijačkih grupa (uglavnom mlade starosne dobi) na sportskim okupljanjima nastavljeno je i u ovom periodu. Tako je tokom marta 2010. godine došlo do fizičkih sukoba između navijača „Zrinjskog“ i „Sarajeva“, što je za posljedicu imalo nanošenje težih fizičkih povreda jednoj osobi. Isto tako, pojedine sportske manifestacije su i tokom 2010. godine bile iskorištene od strane pojedinaca, ali i pojedinih navijačkih grupa, za iskazivanje nacionalne netrpeljivosti uz nacionalistička vrijeđanja i isticanje simbola koji vrijeđaju nacionalne osjećaje građana BiH (npr. fizički sukobi navijača srpske i bošnjačke nacionalnosti na fudbalskoj utakmici u Janji ili isticanje nacističkih simbola na fudbalskoj utakmici u Širokom Brijegu).

3. 2. Oštećenje ili rušenje vjerskih objekata

I dalje je prisutan trend izvršenja raznovrsnih akata nasilja prema vjerskim objektima, vjerskim službenicima i vjerskim obilježjima svih konfesionalnih zajednica u BiH. Uglavnom su ovi akti i dalje vršeni prema objektima konfesionalnih zajednica u sredinama gdje nije došlo do potpunog povratka prijeratnog stanovništva (u 20 manjih i većih naselja u BiH; prethodne godine u deset naselja u BiH). Takođe, u 2010. godini je na osam lokacija u BiH registrirano sknavljenje i uništavanje lokalnih grobalja (prethodne godine na sedam lokacija u BiH).

Svi takvi akti nasilja su u određenoj mjeri negativno utjecali na sigurnosnu situaciju i međunacionalne odnose na pojedinim područjima. Eventualne posljedice u vidu neposrednih sukoba ili revanšističkih akata bile su samo sporadične.

Kao i prethodnih godina, i 2010. godine samo je neznatan broj počinitelja napada na vjerske objekte otkriven, što je u određenoj mjeri utjecalo na stvaranje osjećaja nesigurnosti građana, te otvaranja mogućnosti manipuliranja i zloupotrebe navedenih događaja.

3. 3. Sprječavanje povratka izbjeglica i raseljenih osoba

U 2010. godini takođe je nastavljen trend napada na imovinu povratnika na cijelom području BiH. Iako nema čvrstih pokazatelja da se radi o organiziranim napadima, neka od počinjenih djela načinom izvršenja mogu se dovesti u vezu sa pokušajima pojedinaca da se, sa nejasnim motivima, suprotstave povratku građana u ranija mjesta boravka. Raspoloživa policijska saznanja za sada samo indiciraju potencijalne izvršioce u nekim od slučajeva, a time ostaju većinom otvoreni i motivi navedenih napada. Stoga se sa sigurnošću ne može reći da su navedeni napadi izvršeni ili da se izvršavaju u cilju opstruiranja Aneksa 7. Dejtonskog sporazuma. Međutim, činjenica je da su takvi incidenti utjecali na stvaranje osjećaja nesigurnosti među povratničkom populacijom.

Isto tako, u 2010. godini je, zbog neriješenih problema u vezi sa imovinom ili nekim drugim pitanjima mještana, na nekim područjima nastavljeno različito ispoljavanje nezadovoljstva povratnika, čime se takođe i dalje zadržalo stanje frustriranog međunacionalnog odnosa i napetosti u tim sredinama.

4. Krivična djela protiv integriteta BiH

4. 1. Napad na ustavni poredak i ugrožavanje teritorijalne cjeline

Na osnovu naredbi Suda i Tužilaštva BiH, 2. februara 2010. godine izvedena je združena policijska akcija u cilju dokumentiranja nezakonitog djelovanja tzv. vehabijske zajednice, formirane od veće grupe osoba na području Gornje Maoče, općina Srebrenik. Akcija je rezultirala lišavanjem slobode osam osoba, zbog postojanja osnova sumnje da su počinili krivična djela iz Krivičnog zakona BiH i Krivičnog zakona FBiH: **organizirani kriminal u vezi sa krivičnim djelom napad na ustavni poredak, ugrožavanje teritorijalne cjeline**, izazivanje narodnosne, rasne ili vjerske mržnje, razdora ili netrpeljivosti, zatim sa krivičnim djelom sprječavanje povratka izbjeglica i raseljenih osoba, samovlašće, povreda slobode opredjeljenja birača, učestvovanje u grupi koja spriječi službenu osobu u vršenju službene radnje, nedozvoljeno držanje oružja ili eksplozivnih materija, te ometanje rada pravosuđa.

Izvršenim pretresima osumnjičenih osoba, stambenih i pomoćnih objekata, kao i vozila koja su koristili, policijski službenici su pronašli, a zbog postojanja osnova sumnje da potječu od izvršenja krivičnog djela, privremeno oduzeli: 18 pištolja, sedam pušaka, 30 okvira za pištolj, osam ručnih bombi, 21 nož, jedan bajonet, jednu sablju, jedan luk-samostrel sa četiri strijele, 956 komada municije različitog kalibra, 20 vojnih uniformi, 32 komada vojne opreme, 47 radio uređaja, 70 mobilnih telefona, 19 SIM kartica za mobilne telefone, 1478 komada DVD-a, CD-a i disketa, 421 audio i video kasetu, 40 laptop računara, četiri kamere, jedan foto aparat, dva pečata kao i 34.565 eura, 2480 KM i 25 AUD, te razne dokumente, priručnike, knjige i drugo. Sedam osoba lišenih slobode je, uz službeni izvještaj, predato na dalje postupanje Tužilaštvu BiH, koje je od Suda BiH zatražilo određivanje tridesetodnevnog pritvora, što je i prihvaćeno, dok je stranom državljaninu određen ekstradiციjski pritvor, čijim je istekom deportovan u Republiku Hrvatsku, jer je njezin državljanin. Sud BiH je 26. februara 2010. godine za svih sedam osumnjičenih ukinuo mjeru pritvora, uz donošenje niza mjera zabrane kretanja i ostvarivanja kontakata sa bilo kim, osim sa članovima porodice i angažiranim advokatima. Dalja istraga je u toku.

U 2010. godini Federalno Ministarstvo unutrašnjih poslova je registriralo šest krivičnih djela protiv ustavnog poretka Federacije BiH, što je za 12 djela ili 66,6% manje nego u 2009. godini. Radi se o dva krivična djela iz člana 149. KZ FBiH (napad na ustavni poredak Federacije) i četiri iz člana 163. KZ FBiH (izazivanje narodnosne, rasne i vjerske mržnje, razdora ili netrpeljivosti), za koja je prijavljeno deset osoba, među kojima je jedan povratnik u vršenju krivičnih djela.

5. Krivična djela protiv čovječnosti i vrijednosti zaštićenih međunarodnim pravom

5. 1. Saradnja sa Haškim tribunalom i procesuiranje ratnih zločina

Nastavljena je saradnja tužilaštava, obavještajnih i sigurnosnih službi BiH, Srbije i Crne Gore, sa istražiocima Tužilaštva Haškog tribunala i međunarodnim vojnim snagama. U tom smislu, organizirano je i realizirano više radnih sastanaka i dogovora regionalnog karaktera, koji su tematski bili usmjereni na okončanje potrage za preostalim haškim optuženicima.

Postupajući po zahtjevima Ureda za saradnju sa Međunarodnim krivičnim sudom za bivšu Jugoslaviju (MKSJ) u Banja Luci, u 2010. godini dostavljeno je 18 odgovora, a po zahtjevima Ureda u Sarajevu 39 odgovora, koja se odnose na dostavu razne dokumentacije, provjera i drugih materijala u vezi sa postupcima u Hagu, zatim dostavu obavezujućih naloga za svjedočenje pred tribunalom, provjere za osobe, poziva za svjedočenja i dr. Po zahtjevima Instituta za nestale osobe u postupku su provjere za 405 osoba sa statusom „nepokrenut slučaj“, a provjerama kroz evidencije IDDEEA-e pronađene su 22 osobe, koje su prijavljene kao nestale u ratu. Postupano je i po više desetina zahtjeva raznih institucija, koji se uglavnom odnose na pronalaženje preostalih haških optuženika, ustupanjem dokumentacije, razne provjere, istraživanje ratnih zločina i dr.

Nastavljene su aktivnosti na pregledu, klasificiranju, provjeri i korištenju ranije pribavljene dokumentacije i informacija o ratnim zločinima, a u 2010. godini i intenziviran rad na prikupljanju novih dokumenata, svjedočenja, informacija, video i fono zapisa i drugih materijalnih dokaza.

5. 2. Krijumčarenje migranata i trgovina ljudima

- Krivična djela krijumčarenje ljudi

Red. Br.	MUP-ovi entiteta i Policija Brčko Distrikta BiH	Broj otkrivenih KD	
		2010.god.	2009.god.
1.	MUP-a F BiH	4	1
2.	MUP-a RS	5	4
3.	Policija Brčko Distrikta BiH	-	-
4.	Granična policija BiH	24	27
5.	SIPA	7	1
Ukupno u BiH		40	33

- Krivična djela trgovina ljudima

Red. Br.	MUP-ovi entiteta i Policija Brčko Distrikta BiH	Broj otkrivenih KD	
		2010.god.	2009.god.
1.	MUP-a F BiH	-	2
2.	MUP-a RS	1	3
3.	Policija Brčko Distrikta BiH	-	-
4.	Granična policija BiH	-	3
5.	SIPA	11	6
Ukupno u BiH		12	14

U 2010. godini u BiH je registrirano 40 krivičnih djela krijumčarenje ljudi, što je za **21,21% više nego prethodne godine**. U oblasti krivičnih djela trgovina ljudima je **zabilježen blagi pad broja izvršenih djela za 14,28%**.

Međutim, prema statističkim podacima evidentan je porast broja maloljetnih žrtava kojima se trguje u BiH, tako da je BiH sve manje zemlja tranzita, a sve više zemlja porijekla žrtava trgovine ljudima.


Obavještajni podaci ukazuju da osobe iz BiH koje su uključene u lanac krijumčarenja osoba za ilegalnu imigraciju stranih državljana koriste više ruta koje idu od Albanije preko BiH prema Hrvatskoj, a zatim u zemlje Zapadne Evrope. Pored navedenog, jedna ruta ide iz Srbije u BiH, odakle se žrtve trgovine ljudima dalje prebacuju u Hrvatsku i u zemlje Zapadne Evrope.

Na osnovu istih podataka uočeno je izvršenje krivičnih djela trgovine ljudima kroz različite oblike radne eksploatacije (prosjačenje, radovi na poljoprivrednim imanjima, građevinski radovi itd.) u kojima su žrtve državljani BiH. U pripremne aktivnosti za rješavanje problema organiziranog prosjačenja uključeno je više institucija BiH, s obzirom da represivne policijske mjere ne daju očekivane rezultate. Značajan korak u rješavanju navedenog problema će preduzeti iz svoje nadležnosti i Ministarstvo za ljudska prava i izbjeglice BiH, prije svega u preventivnom djelovanju prema potencijalnim žrtvama.

Presijecanje nekoliko lanaca organizirane trgovine ljudima koje su izvršili SIPA i Granična policija BiH u posljednje dvije godine, utjecalo je na stagniranje krivičnih djela trgovina ljudima a onda, s tim u vezi, i na smanjenje trenda krijumčarenja ljudi u BiH u odnosu na neke ranije godine. S obzirom da je riječ o najprofitabilnijim oblicima organiziranog kriminala, dolazi do promjena načina izvršenja pa je primjetno da u posljednje vrijeme kriminalne osobe krijumčarenje stranih državljana kroz BiH vrše pojedinačno ili u manjim grupama, mijenjajući rute, načine transporta i smještaja. Evidentno je da najveći broj krijumčarenih osoba u BiH ulazi iz Crne Gore i Srbije koristeći nepotpunu pokrivenost granice (lokalne puteve, šumske puteve, vodene tokove i sl.).

Na narednom grafikonu sumirani su podaci o krivičnim djelima krijumčarenje osoba i trgovina ljudima u BiH u periodu 2007.-2010. godina. Vidljiv je pad u broju djela kao rezultat prije svega policijskih mjera i akcija na presijecanju takvih ilegalnih aktivnosti:

KD krijumčarenje osoba i trgovina ljudima u BiH



5. 3. Ugrožavanje osoba pod međunarodnom zaštitom

U 2010. godini SIPA je podnijela tri izvještaja protiv tri osobe, koja se odnose na krivično djelo narušavanje sigurnosti osoba pod međunarodnopravnom zaštitom:

- izvještaj o počinjenom krivičnom djelu protiv jedne osobe zbog postojanja osnova sumnje da je počinila krivično djelo iz KZ BiH ugrožavanje osoba pod međunarodnopravnom zaštitom i krivično djelo ugrožavanje sigurnosti;
- izvještaj o počinjenom krivičnom djelu protiv jedne osobe zbog postojanja osnova sumnje da je počinila krivično djelo iz KZ BiH organizirani kriminal a u vezi sa krivičnim djelom ugrožavanje sigurnosti;
- izvještaj o počinjenom krivičnom djelu protiv jedne osobe zbog postojanja osnova sumnje da je počinila krivično djelo iz KZ BiH ugrožavanje osoba pod međunarodnopravnom zaštitom i krivično djelo iz KZ BiH ometanje rada pravosuđa.

5.4. Nedozvoljeno držanje oružja ili eksplozivnih materija i trgovina oružjem i vojnom opremom

Red. Br.	MUP-ovi entiteta i Policija Brčko Distrikta BiH	KD nedozvoljeno držanje oružja ili eks.materijala		
		2010.god.	2009.god.	+/-%
1.	MUP-a F BiH	308	373	-17,42
2.	MUP-a RS	489	422	15,87
3.	Policija Brčko Distrikta BiH	9	6	50
3.	SIPA	19	10	90
Ukupno u BiH		825	811	1,72

Oduzeto oružje, municija, minsko-eksplozivna sredstva


Red. Br.	MUP-ovi entiteta Policija Brčko Distrikta BiH i druge agencije	Oduzeto vatreno oružje u komadima	
		2010.god.	2009.god.
1.	MUP-a F BiH	1393	1158
2.	MUP-a RS	1059	981
3.	Policija Brčko Distrikta BiH	189	167
4.	SIPA	-	-
5.	Granična policija BiH	66	93
Ukupno u BiH		2707	2399

Pored toga, oduzeto je i 54.470 komada municije raznog kalibra.

U 2010. godini u BiH je za 1,72% više krivičnih djela vezanih za ilegalno držanje i trgovinu oružja, municije i minsko-eksplozivnih sredstava nego u prethodnoj godini.

U akcijama sigurnosnih agencija u BiH u prošloj godini oduzeto je za 12,83% više vatrenog oružja i minsko-eksplozivnih sredstava nego prethodne godine, što je rezultat pojačanih aktivnosti policije na terenu. Međutim, kod građana je još uvijek velika količina naoružanja, a neki obavještajni podaci ukazuju da ponovo oživljava ilegalna trgovina oružjem od Kosova, Crne Gore preko BiH do Hrvatske i dalje.

Na bh. graničnim prijelazima u 2010. godini pripadnici Granične policije BiH pronašli su i oduzeli 66 komada raznog vatrenog oružja. Izdvajamo neke prijelaze:



**GP Dobrljin:4puške, od
toga 2 lovačke**

GP Trebinje: 9 pištolja

GP Gradiška:3puške, od toga2 lovačke

GP Višegrad:2 lovačke puške

GP Kamensko:pištolj, lovačka puška i

2 detonatorske kapisle

GP Brčko: 100 kom. razne municije

GP Brod: 1 vazдушna puška i 23 kom. municije

GP Kladuša: 2 lovačke puške

GP Orašje: 8 ručnih bombi, 1 lovačka puška i 400. kom municije

GP Izačić: 2 puške, od kojih 1 lovačka

Na Graničnom prijelazu Trebinje zaplijenjeno je devet pištolja. U ovom graničnom pojasu prema Crnoj Gori, nakon izvjesnog „zatišja“, ponovo je prisutna trgovina oružjem, posebno pištoljima, jer je „duge cijevi“ teže prebaciti preko granice. Na Graničnom prijelazu Orašje zaplijenjeno je osam ručnih bombi, što potvrđuje ranija policijska saznanja da pojedine osobe prenose iz BiH minsko-eksplozivna sredstva u Hrvatsku i tamo ih lageruju do vremena kada će Hrvatska ući u EU da bi ih lakše prodali u zapadnoevropskim zemljama. Sve ovo ukazuje da ovaj vid kriminala ima međunarodnu dimenziju sa jakim obilježjima organiziranosti.

U okviru rada na predmetima po problematici neovlaštenog prometa i trgovine oružjem i vojnom opremom, Državna agencija za istrage i zaštitu vršila je u 2010. godini istrage protiv više osoba zbog postojanja sumnje da učestvuju u vršenju ovog krivičnog djela, i u okviru čega se došlo do saznanja i dokaza na osnovu kojih je podneseno 19 izvještaja o počinjenom krivičnom djelu protiv 67 osoba, od kojih 4 NN osobe. Da je riječ o složenim slučajevima organiziranog kriminala, potvrđuje i izvještaj Agencije o počinjenom krivičnom djelu protiv dvije osobe zbog postojanja osnova sumnje da su počinila krivično djelo iz člana 195. KZ BiH

(neovlašten promet opojnim drogama), a u vezi sa krivičnim djelom iz člana 193. KZ BiH (neovlašten promet oružjem i vojnom opremom), te jedan izvještaj protiv 11 osoba zbog postojanja osnova sumnje da su počinili krivično djelo iz člana 250. KZ BiH (organizirani kriminal), a u vezi sa krivičnim djelom iz člana 195. KZ BiH (neovlašten promet opojnim drogama) i krivičnim djelom iz člana 193. KZ BiH (neovlašten promet oružjem i vojnom opremom).

U policijskim akcijama širih razmjera u Republici Srpskoj i u Federaciji BiH, od kojih su neke bile i zajedničke, usmjerenih na razbijanje organiziranog kriminala zaplijenjeno je 47 komada raznog vatrenog oružja, od ručnih bombi i pušaka do pištolja, i više stotina komada municije raznog kalibra.


Velika količina naoružanja u ilegalnom posjedu utječe i na broj oružanih incidenata u BiH (misli se na ubistva, oružane pljačke, napade na tijelo i život i remećenje javnog reda i mira pucnjavom), koji su iz godine u godinu u porastu.

Suprotstavljajući se pomenutim oblicima kriminala, MUP Republike Srpske registrirao je 116 krivičnih djela izazivanje opće opasnosti, što je 31,4% manje, a njihova ukupna rasvijetljenost je vrlo povoljna i iznosi 88%. Za izvršenje ovih krivičnih djela prijavljena su 102 počinioca. Evidentirano je 27 eksplozija (u 2009.godini 39), od kojih su u devet slučajeva predmet napada bili stambeni objekti, osam ugostiteljski lokali, trgovine i poslovni prostori, jednom automobil, a u ostalim slučajevima otvoreni prostor. Eksplozije su u 20 slučajeva izazvane podmetanjem ili bacanjem ručnih bombi i drugih eksplozivnih naprava, šest je nastalo nesmotnošću i jedna u obilježenom minskom polju. Poginule su tri a ranjeno 11 osoba, uz pričinjenu veliku materijalnu štetu.

Federalni MUP registrirao je 438 krivičnih djela protiv opće sigurnosti ljudi i imovine (više za 8,7%) od čega 365 krivičnih djela izazivanje opće opasnosti, što je za 4,3% više nego u 2009. godini. Rasvijetljeno je 58.9% takvih djela za koja je prijavljeno 286 osoba. Među objektima koji su s namjerom bili predmet napada su, između ostalog, automobili, ugostiteljski objekti, porodične kuće i dr. na kojima je pričinjena materijalna šteta. Takođe, registrirano je jedno krivično djelo nepropisni prijevoz eksplozivnog ili zapaljivog materijala.

5. 5.Neovlaštena proizvodnja i stavljanje u promet opojnih droga

Na narednom grafikonu prikazano je silazno kretanje broja krivičnih djela u vezi sa zloupotrebom droga u Bosni i Hercegovini u višegodišnjem periodu, od 2007.-2010. godine:



Takav trend je nastavljen. Broj krivičnih djela u vezi sa zloupotrebom droga je u 2010. godini u padu za 88 djela ili za 6,34% u odnosu na prethodnu godinu. To konkretnije pokazuju i podaci u sljedećoj tabeli:

Red. Br.	MUP-ovi entiteta i Policija Brčko Distrikta BiH	KD zloupotreba droge		
		2010.god.	2009.god.	+/-%
1.	MUP-a F BiH	953	1087	-12,32
2.	MUP-a RS*	213	197	8,12
3.	Policija Brčko Distrikta BiH	54	45	20,00
4.	Granična policija BiH	38	52	-26,92
5..	SIPA	42	7	500
Ukupno u BiH		1300	1388	-6,34

*U Republici Srpskoj se djelo nezakonito posjedovanje opojnih droga vodi po prekršajnom postupku. Takvih prekršaja-prijava u 2010. godini bilo je 162.

U 2010. godini Granična policija BiH podnijela je nadležnim tužilaštvima 38 službenih izvještaja (2009.- 52) zbog počinjenih 38 krivičnih djela neovlaštene proizvodnje i stavljanja u promet opojnih droga (2009.- 52) u kojima je prijavljeno 55 osoba (2009. - 60). Za ova krivična djela najviše je prijavljeno državljana BiH - 41 , Crne Gore- 4, Hrvatske -2, Slovenije -2, Srbije -1, Austrije -1 itd.

Vrste i količine oduzetih opojnih droga zaplijenjenih na državnoj granici date su u tabeli:

Vrsta droge	2010.god.	2009.god.
Marihuana	36.143 gr.	54.373 gr.
Marihuana-sjemenke	19 kom.	13 kom.
Marihuana - stabljika	408 kom.	101 kom.
Skank	10,357 gr.	-
Kokain	1,45 gr.	1.461,71 gr.
Heroin	0,67 gr.	1.694,89 gr.
Bromazepam	325 kom.	691 kom.
Diazepam	99 kom.	182 kom.
Spid	0,98 gr.	-
Ekstazi	-	0,5 gr.
Hašiš	0,041 gr.	7,4 gr.
Amfetamin	4,5 kom.	20,55 gr.

Treba posebno istaći pronalazak 1.957 grama marihune u graničnom pojasu općine Bileća, zapljenu 10.357 gr. droge skank na graničnom prijelazu Deleuša u zoni odgovornosti JGP Trebinje, zapljenu 10.327 gr. marihuane u graničnom pojasu općine Kozarska Dubica u zoni odgovornosti JGP Gradiška i zapljenu 23.449 gr. marihuane u graničnom pojasu općine Čajniče u zoni odgovornosti JGP Hum. Međutim, u 2010. godini na granicama BiH je znatno manje zaplijenjeno heroina i kokaina, iako je zapljena ovih droga u unutrašnjosti BiH bila veća: heroina 26 kg. i 472 gr. a kokaina 1,5 kg. Takođe, na granici nije zaplijenjena nijedna tableta ekstazija a u unutrašnjosti BiH je zaplijenjeno preko 16.500 tableta.

Granična policija BiH je učestvovala i u zajedničkim akcijama sa drugim agencijama u BiH. U dva navrata je spriječila krijumčarenje većih količina opojne droge. U zajedničkoj akciji sa MUP-om RS, MUP-om Kantona Sarajevo, MUP-om HNK, MUP-om Tuzlanskog kantona i Obavještajno-sigurnosnom agencijom BiH zaplijenjeno je oko 8 kg. marihuane-skank, jedno putničko vozilo te određena količina kokaina, spida, vatrenog oružja, mobilnih telefona i dr. Takođe, MUP-u RS data je operativna informacija o postojanju laboratorije za uzgoj i pripremu skanka na području Ribnika (u izvedenoj akciji oprema zaplijenjena). Isto tako, na osnovu razmjene operativnih informacija sa Državnom agencijom za istrage i zaštitu, na graničnom prijelazu Klobuk pripadnici Granične policije BiH su spriječili krijumčarenje oko 155 kg. droge skank.

Na prostoru BiH u 2010. godini među najzastupljenijim opojnim drogama bio je skank, koncentrirana indijska konoplja poput marihuane, ali sa mnogostruko jačim djelovanjem od marihuane. Operativna saznanja govore da se ova vrsta droge doprema iz Albanije preko Crne Gore, da bi preko područja Hercegovine stigla do središnjeg dijela BiH i dalje prema Zapadnoj Evropi.

Naredna tabela prikazuje količinu zaplijenjene droge u **unutrašnjosti** Bosne i Hercegovine u 2010. godini (i uporedo u 2009. godini) na osnovu podataka MUP-a RS, Federalnog MUP-a, Policije Brčko Distrikta BiH i SIPA-e:


Vrsta	2010. godine	2009. godine
Heroin	26.472 gr.	26.226 gr.
Kokain	1.505 gr.	2.530 gr.
Ekstazi	16.505 kom.	543kom.i 225gr.
Amfetamin	1.371 gr.	319 gr.
Marihuana	277.669 gr.	43.336 gr.
Skank	141.413 gr.	-
Hašiš	3.4gr.	9,7 gr.
Kanabis biljka	7.361 kom.	3.711 kom.
Kanabis sjeme	95.091 kom.	3584kom.i 460 gr.
Spid	104,5 gr.	430,2 gr.
Ostali narkoanalgetici	185 kom. tabl.	110 kom.tabl.

Iako je količina zaplijenjene droge u unutrašnjosti BiH još uvijek znatno veća nego na njezinoj granici (što može dijelom biti i zbog operativnih mjera), **u 2010. godini su ostvareni, u odnosu na prethodne godine, pozitivni pomaci na otkrivanju ilegalnog prometa opojnih droga preko državne granice (posebno u otkrivanju skanka).** U tome su uspjeha imale i ostale policijske agencije BiH, kako pojedinačno tako i u zajedničkim akcijama u BiH, kojih je bilo 12.


Vrijednost ukupno zaplijenjene droge u BiH u 2010. godini je za 55,58% veća nego u 2009. godini i iznosi 8.062.725 KM, i to zahvaljujući prije svega enormnom povećanju cijena heroina i kokaina na ilegalnom tržištu narkotika, izazvanom uspješnim akcijama policija susjednih zemalja na presijecanju dilerskog lanca, kao i sve prisutnijem skanku na tom tržištu koji je utjecao na pad cijene „obične“ marihuane. Ukupna zapljena skanka u 2010. godini najveća je u posljednje tri godine. Takođe, otkriveno je devet zasada indijske konoplje i pronađeno pet manjih i većih laboratorija za preradu droge.

Višegodišnji statistički podaci o policijskoj zapljeni pojedinih vrsta droge u BiH prikazani su na narednim grafikonima, koji ujedno pokazuju i ključne trendove u toj oblasti:


Zaplijeljen heroin (u kg) porijeklo: Azija




Zaplijeljen kokain (u kg) porijeklo: Južna Amerika




Zaplijeljen ekstazi (u broju tableta)




Zaplijeljen amfetamin u kg



Zapljena marihuane (u kg)



Zaplijeljen kanabis - biljka (vrsta marihuane u komadima)



5. 6. Terorizam

Zbog napada eksplozivnom napravom na policijsku stanicu u Bugojnu (27.6. 2010. godine, u kojem je jedan policajac ubijen a pet ih povrijeđeno), Tužilaštvu BiH podnesena su dva službena izvještaja protiv tri osobe, državljana BiH, iz člana 201. KZ BiH-terorizam (29.6. i 7.9. 2010. godine), dok je protiv tri osobe, takođe državljanke BiH, 29.6.2010., podniet izvještaj zbog postojanja osnova sumnje da su pružali pomoć učiniocima nakon učinjenog ovog krivičnog djela (član 232. KZ BiH a u vezi sa članom 201.KZ BiH).

Tužilaštvo BiH istraživalo je sve aspekte ovog akta u Bugojnu, s obzirom da se radi o osobama koja su u sredinama gdje žive već ispoljavale nasilničko ponašanje, upućivale prijetnje povratnicima, narušavale javni red i mir te bile izvršioци i drugih kriminalnih djela. **Sud BiH je 22.12.2010. godine potvrdio optužnicu u ovom predmetu.**

Poslije napada u Bugojnu, registrirano je i nekoliko slučajeva anonimnih dojava o navodnom postavljanju eksplozivnih naprava na drugim objektima i lokalitetima, ispisivanje grafita prijetećeg sadržaja i slično. Neki od počinitelja pomenutih djela su identificirani a nadležni organi su prema njima preduzeli zakonske mjere.

Saznanja Obavještajno-sigurnosne agencije BiH su doprinijela da pripadnici sigurnosnih organa i agencija u BiH u nekoliko navrata, na širem području Sarajeva, Bugojna, Gornjeg Vakufa/Uskoplja, Goražda i Jajca pronađu i izuzmu određenu količinu oružja i minsko-eksplozivnih sredstava, te audio-vizuelnih propagandnih materijala, čiji sadržaji podstiču na vršenje akata nasilja, te da prema počiniocima ovih krivičnih djela preduzmu zakonom određene mjere.

Na području BiH, prema raspoloživim podacima, postoje i ilegalno djeluju, nezavisno jedni od drugih, radikalno opredijeljeni pojedinci i manje grupe, koji ne poštuju poredak i zakone BiH i pokušavaju na to podsticati i druge. Pojedinci među njima, u određenim situacijama kulminacije ličnog nezadovoljstva, ispoljavaju i spremnost za primjenu nasilnih metoda. Aktivnosti ovih osoba operativno se prate i za sada nisu poprimile forme organiziranosti kojima bi se mogla značajnije ugroziti sigurnost odnosno ustavno-pravni poredak BiH. Oni u neznatnoj mjeri nailaze na podršku pristalica radikalne orijentacije, a u znatno većem obimu na osudu i davanje podrške sigurnosnim organima i institucijama na sprječavanju protivzakonitih aktivnosti ovih pojedinaca i grupa. Nerijetko su pripadnici ovih neformalnih grupa osobe sklone agresivnom i konfliktnom ponašanju, koje iznenada i sa različitim motivima i povodima može kulminirati u nekontrolirano reagiranje, bez neke prethodne duže i obimnije pripreme i plana.

Mjere koje su u prošloj godini provodile državne institucije u borbi protiv terorizma i organiziranog kriminala te drugi potezi BiH na međunarodnom planu (zalaganja i odluke institucija BiH o učešćima u međunarodnim misijama u Iraku i Avganistanu) kod određenih struktura selefija naišle su na osudu i otvoreno izražavanje nezadovoljstva, kod pojedinaca i spremnost da nezadovoljstvo ispolje ne samo verbalno.

Izvjestan broj osoba iz ove kategorije selefija svoj ekstremizam ispoljava uglavnom kroz određene postupke nelojalnosti prema državi i njenom demokratskom poretку. U tom se kontekstu jedna mala lokalna zajednica pokušala izdvojiti u samostalnu cjelinu, koja bi, ne samo u religijskom nego i u svjetovnom smislu, bila drugačije organizirana u odnosu na druge lokalne zajednice u BiH i postojeće zakonske propise (G.Maoča). Ovakve aktivnosti grupa je pokušavala proširiti i na druga područja u BiH, ali je policijskom akcijom njezina djelatnost presječena. Pred Sudom BiH u toku je sudski postupak protiv sedam državljana BiH, uhapšenih na području

Gornje Maoče, koji se sumnjiče za krivično djelo **organizirani kriminal u vezi s krivičnim djelima-napad na ustavni poredak BiH, ugrožavanje teritorijalne cjeline, izazivanje rasne i vjerske mržnje, razdora i netrpeljivosti i nedozvoljeno držanje oružja ili eksplozivnih materija.**

Naknadne refleksije u vezi sa mjerama organa vlasti prema pojedincima iz Gornje Maoče (slučaj pomenut na str.12), osim određenih više verbalnih reakcija protivljenja toj akciji i negodovanja, nisu imale i neku značajniju sigurnosnu dimenziju, kako u samoj G.Maoči i okruženju tako i na cijelom prostoru BiH. Dio selefista je tim povodom upućivao verbalne prijetnje koje nisu imale naknadnu konkretnu potvrdu. Na pojedinim područjima, uglavnom oko G.Maoče, evidentirani su sporadični slučajevi dijeljenja letaka u kojima se navodilo da je na djelu "hajka na islam i muslimane u BiH".

Sredinom marta 2010. godine, organi sigurnosti BiH su, po dojavi kontraverzne osobe, inače pripadnika selefijskog pokreta, pronašli i izuzeli veću količinu TNT eksploziva (56 kilograma) na smetlištu Lakiševina kod Mostara.

U 2010. godini nastavljene su sigurnosno interesantne aktivnosti pojedinih pripadnika radikalnih religioznih grupa u BiH, koji su na različite načine (kroz predavanja, putem određenih Web portala i rasturanjem audio-vizuelnih propagandnih materijala) podstrekavali na vjersku i nacionalnu netoleranciju, pozivali na mržnju i ekstremizam, te verbalno promovirali koncept džihada.

Podaci o sigurnosnim aspektima aktivnosti pojedinih osoba stranog porijekla u BiH za sada ne ukazuju na konkretniju vezu tih osoba sa međunarodnim terorizmom. Ipak, i dalje sugeriraju postojanje kontakata sa drugim osobama iz tog miljea u inostranstvu, te mogućeg korištenja BiH kao zemlje u tranzitu. Iako se trenutno ne raspolaže saznanjima o njihovoj terorističkoj djelatnosti, ocijenjeno je da iz ranijih aktivnosti i ranijih veza pojedinih naturalizovanih državljana BiH, od kojih neki i dalje borave u BiH, imajući državljanstvo BiH ili boraveći po drugom osnovu, proističu određeni rizici po sigurnost BiH.

Obavještajno-sigurnosna agencija (OSA) u posmatranom periodu takođe **nije došla do konkretnih podataka, koji bi ukazivali na mogućnost** da neke novoformirane humanitarne organizacije u BiH «zloupotrebljavaju svoje djelovanje na način da su se transformirale i nastavile djelovati u drugom obliku i pod drugim imenom», o čemu su , u više navrata, u pojedinim medijima prezentirani sadržaji o navodnom nastavku aktivnosti u Bosni i Hercegovini raznih humanitarnih organizacija čiji je rad zabranjen tokom 2001.-2004. godine.

Stanje kriminala u oblasti finansiranja terorističkih aktivnosti, posmatrano sa aspekta statističkih i drugih pokazatelja, od 2008.godine ima tendenciju pada, na što ukazuje prijavljivanje manjeg broja sumnjivih transakcija koje ukazuju na predmetni oblik kriminala, manji broj zahtjeva za provjeru posredstvom Egmont grupe i broj predmeta u radu koji je relativno smanjen. Ipak, Državna agencija za istrage i zaštitu BiH (SIPA) je u 2010. godini, radeći na istraživanju, otkrivanju i sprječavanju krivičnih djela terorizma, podnijela izvještaj o počinjenom krivičnom djelu protiv dvije osobe i jedne NN osobe zbog postojanja osnova sumnje da su počinile krivično djelo **iz člana 202. KZ BiH (finansiranje terorističkih aktivnosti)** i člana 201. KZ BiH (terorizam). Takođe, u 2009. godini SIPA je nadležnim tužilaštvima podnijela četiri izvještaja o počinjenom krivičnom djelu, kojima je prijavljeno pet osoba i jednu dopunu protiv jedne osobe, koje se dovode u vezu sa krivičnim djelom terorizma.

Obavještajno-sigurnosna agencija (OSA) BiH raspolaže podacima da su i u 2010. godini nastavljena nastojanja pojedinaca iz BiH da na njezinu teritoriju prenesu aktivnost organizacija

koje djeluju sa pozicija neofašima i neonacizma, prije svega iz zemalja u okruženju. Navedena aktivnost se kretala od javnog verbalnog eksponiranja pojedinih pripadnika i simpatizera navedenih organizacija jezikom mržnje ili posredstvom pojedinih internet portala, preko pisanja, lijepljenja i rasturanja uvredljivih grafita, plakata i naljepnica sa nacističkim, fašističkim i rasističkim sadržajima kojima se propagira, širi i podstiče nacionalna, vjerska i rasna mržnja i netrpeljivost. Pomenute pojave su izazvale uznemirenost lokalnog stanovništva, naročito povratničke populacije.

Jedna od novijih uočenih pojava kod neonacističkih i neofašističkih organizacija je i modificiranje načina organiziranja i ispoljavanja stavova na raznim skupovima i u raznim prilikama (uzrokovano dijelom i formalnom zabranom istupanja u javnosti zemalja u regiji), kroz istupanje njihovih pripadnika sa različitim organizacijama slične orijentacije. U posljednje vrijeme, za ostvarivanje svojih ciljeva i javno propagiranje svojih ideja, koriste se ultranacionalističkim navijačkim skupinama poznatim po ekstremnim istupima.

6. Krivična djela protiv privrede i jedinstva tržišta te krivična djela iz oblasti carina

Krivična djela privrednog kriminala su u stalnom porastu. U 2010. godini u Bosni i Hercegovini su registrirana **1.353 krivična djela protiv privrede, poslovanja i sigurnosti platnog prometa te iz oblasti poreza i carina, što je za 83 djela ili 6,53% više nego u prethodnoj godini:**

Red. Br.	MUP-ovi entiteta i Policija Brčko Distrikta BiH	Broj evidentiranih krivičnih djela		
		2010.	2009.	+/-%
1.	MUP-a F BiH	349	379	-4,53
2.	MUP-a RS	701	661	6,00
3.	Policija Brčko Distrikta BiH	80	73	9,58
4.	SIPA	106	43	146,51
5.	Granična policija BiH	7	7	-
6.	Uprava za indirek.oporez.	110	107	2,80
Ukupno u BiH		1353	1270	6,53

Ova vrsta kriminala predstavlja jedan od najozbiljnijih problema za BiH imajući u vidu štetne posljedice po Budžet.

Procijenjena materijalna šteta obuhvaćena izvještajima o ovim krivičnim djelima na nivou BiH u 2010. godini iznosi 207,323.889 KM, a identificirana stečena protivpravna imovinska korist je u iznosu od 18,532.800 KM. Kao izvršioci, prijavljene su 1.133 osobe. Među najbrojnijim krivičnim djelima privrednog kriminala nalaze se **krivična djela korupcije i krivična djela protiv službene i druge odgovorne dužnosti:** zloupotreba ovlaštenja u privredi (120), obmana pri dobijanju kredita ili drugih pogodnosti (120), prevara u privrednom poslovanju (81), falsificiranje ili uništenje službene isprave (77)

te pronevjera u službi (44), a zatim porezna utaja (71), nedozvoljena trgovina (29), organizirani kriminal a u vezi s poreznom utajom i carinskom prevarom (20) i tako dalje. Zabrinjava podatak da je u privrednom kriminalu sve više počinjenih djela iz člana 250.KZ BiH (organizirani kriminal), što ukazuje (na duže staze) u kojem se pravcu kreće ova vrsta kriminala ukoliko se ne preduzmu preventivne i druge mjere.

Državna agencija za istrage i zaštitu je u 2010. godini, radeći na sprječavanju i otkrivanju krivičnih djela finansijskog kriminala i korupcije nadležnim tužilaštvima podnijela 51 izvještaj o počinjenom krivičnom djelu protiv ukupno 117 osoba, od čega 109 fizičkih, osam pravnih i više NN osoba, što je za 121,73% više izvještaja o počinjenom krivičnom djelu u odnosu na 2009. godinu, kada su podnesena 23 izvještaja, dok je prijavljeno 37,64% više osoba u odnosu na 2009. godinu kada je prijavljeno 85 osoba. Navedenim izvještajima prijavljeno je 106 krivičnih djela, što je za 146,51% više u odnosu na 2009. godinu, kada su u izvještajima prijavljena 43 krivična djela. Podnesena je i jedna dopuna izvještaja protiv jedne osobe.

Analizom predmeta **finansijskog kriminala i korupcije** ustanovljeno je da su najčešći pojavi oblici ove vrste kriminala zastupljeni u unutrašnjem i prekograničnom prometovanju roba. Kod unutrašnjeg prometa roba najčešće su prisutna krivična djela poreskih utaja, koja se zasnivaju na fiktivnim i paralelnim preduzećima registriranim **na osnovu lažnih ličnih dokumenata**, i takva preduzeća nestanu kada je potrebno izmiriti poreske obaveze. Prilikom prekograničnog prometa, posebno pri uvozu visokotarifnih roba, prisutna su **krivična djela falsificiranje dokumentacije**, prijavljivanje niže vrijednosti uvezene robe, neplaćanje carina i carinske prevare, zloupotreba položaja i ovlaštenja pojedinih carinskih i graničnih službenika.

Pored navedenog, **krivična djela prevare i korupcije** su zastupljena u oblasti javnih nabavki, kao i u procesu privatizacije državne imovine u BiH.

Novčana sredstva i imovina koja se nezakonito prisvoji vršenjem krivičnih djela poreska utaja, zloupotreba položaja, pranje novca, falsificiranje vrijednosnih papira, primanja dara i drugih oblika koristi i drugih krivičnih djela, uglavnom se legalizuje kupovinom nekretnina, izgradnjom objekata, privatizacijom preduzeća, a u pojedinim slučajevima i transferiranjem novčanih sredstava u inostranstvo.

6. 1. Pranje novca

Državna agencija za istrage i zaštitu je u 2010. godini po problematici pranja novca podnijela ukupno tri izvještaja o počinjenom krivičnom djelu, kojima je prijavljeno pet osoba za šest krivičnih djela. Procijenjena materijalna šteta počinjena ovim krivičnim djelima je 1,3 miliona KM.

Finansijsko-obavještajno odjeljenje SIPA-e koje je nadležno za sprječavanje i istraživanje krivičnih djela pranja novca i finansiranje terorističkih aktivnosti, u 2010. godini je u navedena tri izvještaja evidentiralo iznos od 810.000 KM sa indicijom na pranje novca, dok je u četiri izvještaja u 2009. godini bila obuhvaćena suma novca u iznosu od 12.130.794 KM.

6. 2. Krijumčarenje robama i nedozvoljena trgovina

U 2010. godini u BiH je smanjen broj krivičnih djela iz ove oblasti privrednog kriminala za 13,40%.

Na sprječavanju krijumčarenja i nelegalne trgovine Granična policija BiH je preduzela niz mjera što je rezultiralo smanjenjem broja krivičnih djela.

Pregled registriranih krivičnih djela, podnesenih službenih izvještaja i broja prijavljenih osoba prema podacima Granične policije BiH za krivična djela krijumčarenje robama i nedozvoljena trgovina u 2010. godini sa uporednim podacima za 2009. godinu, dat je u narednoj tabeli:

Vrsta krivičnog djela (kvalifikacija)	Broj krivičnih djela			Broj službenih izvještaja			Broj prijavljenih osoba		
	2010.	2009.	+/- %	2010.	2009.	+/- %	2010.	2009.	+/- %
Krijumčarenje robe	31	52	-40,38	31	51	-39,22	35	43	-18,60
Nedozvoljena trgovina	2	5	-60,00	2	5	-60,00	2	5	-60,00

Za navedena krivična djela prijavljeno je 27 državljanina BiH, 4 Srbije i po jedan državljanin Hrvatske, Italije, Slovenije i Njemačke. Od 31 podnesenog izvještaja, jedan izvještaj se odnosi na član 247. KZ BiH (dogovor za učinjenje krivičnih djela) u vezi sa k.d. krijumčarenje.

Količine nekih privremeno oduzetih roba date su u slijedećoj tabeli:

	2010.	2009.	+/- %
Cigarete (kutija)	25.456	175.122	-85,46
Stoka (grla)	287	439	-34,62
Kafa (kg)	11.136	18	61766,66
Alkoholna pića (l)	580	612	-5,22
Tehnička roba (kom)	63.284	13.600	365,32

Kad je riječ o krijumčarenju cigaretama, pored podatka da je Granična policija u 2010. godini oduzela ukupno 25.456 kutija cigareta, od većih zaplijena treba istaći da su u graničnom pojasu na području Distrikta Brčko od državljanina BiH oduzete 10.892 kutije, u graničnom pojasu JGP Hum na lokalitetu Tjentište od državljanina BiH oduzeto je 3.430 kutija, na graničnom prijelazu Klobuk od državljanina BiH oduzeto je 3.500 kutija, na graničnom prijelazu Gradina od državljanina BiH oduzeto je 1.750 kutija te na Graničnom prijelazu Gradiška 1.354 kutije od državljanina Njemačke. Takođe, službenici Granične policije su u graničnom pojasu općine Bileća spriječili krijumčarenje i od državljanina BiH oduzeli 10.800 kg. kafe, a u više navrata privremeno je oduzeto ukupno 25.000 eura. Dio privremeno oduzete robe i životinja predati su u nadležnost carinskim i inspekcijским organima a drugi dio deponovan u Graničnoj policiji.

Na osnovu podataka Uprave za indirektno oporezivanje BiH, vrijednost privremeno oduzete robe, koja je oduzeta na graničnim prijelazima, carinskim ispostavama i u dubini teritorije na osnovu Zakona o carinskim prekršajima BiH u 2010. godini iznosi oko 1.600.000 KM, dok je u 2009. godini vrijednost privremeno oduzete robe oko 900.000 KM. U 2010. godini Uprava je registrirala 155 krivičnih djela carinske prevare, utaje poreza i krijumčarenja roba, što je za 2,80% više nego u 2009. godini.

Ministarstvo unutrašnjih poslova Republike Srpske podnijelo je izvještaje o počinjenju 12 krivičnih djela nedozvoljene trgovine, a u prethodnoj godini 18. Za ova djela podneseno je 11 izvještaja protiv 12 osoba. Vrijednost robe koja je zaplijenjena zbog krivičnog djela nedozvoljena trgovina iznosi 225.000 KM. Otkrivene slučajeve Policija RS najčešće predaje u nadležnost tržišnoj inspekciji.

6. 3. Krivična djela protiv sistema elektronske obrade podataka

U 2010. godini registrirana su 94 djela iz ove oblasti, što predstavlja smanjenje za 31,9% u odnosu na prethodnu godinu.

Za izvršenje ovih djela prijavljeno je 47 osoba i to za sljedeća krivična djela: neovlašteni pristup zaštićenom sistemu ili mreži elektronske obrade podataka (46 krivičnih djela), kompjuterska prevara (45 djela), dva krivična djela oštećenje kompjuterskih podataka i programa i jedno krivično djelo kompjutersko krivotvorenje.

U junu 2010. godine pripadnici Federalne uprave policije slobode su lišili dvije osobe zbog postojanja osnova sumnje da su počinili krivična djela iz KZ FBiH: krivotvorenje kreditnih i ostalih kartica bezgotovinskog plaćanja i izrada, nabavka, posjed, prodaja i davanje na upotrebu sredstava za krivotvorenje. Oni su neovlašteno pribavili podatke o karticama više državljana SAD-a, koje su potom koristili za kupovinu razne robe ostvarivši protivpravnu imovinsku korist u iznosu od oko 5.800 KM. Izvršenim pretresima stambenih objekata i vozila koje su koristili osumnjičeni pronađena je visokosofisticirana elektronska i kompjuterska oprema, tehnički uređaji te bankovne kartice. Osobe lišene slobode su uz službeni izvještaj predate u nadležnost tužilaštva.

6. 4. Ilegalna proizvodnja, nabavljanje i stavljanje u promet falsificiranih novčanica

U Bosni i Hercegovini je u 2010. godini došlo do znatnijeg pada krivičnih djela ove vrste kriminala. Prema dobijenim podacima, stanje je sljedeće:

Red. Br.	MUP-ovi entiteta i Policija Brčko Distrikta BiH	Broj KD		
		2010.god.	2009.god.	+/-%
1.	MUP-a F BiH	75	111	-32,43
2.	MUP-a RS	47	99	-52,52
3.	Policija Brčko Distrikta BiH	3	2	50
4.	SIPA	6	4	50
Ukupno u BiH		131	216	-39,35

Na osnovu broja registriranih krivičnih djela, i u 2010. godini bile su prisutne aktivnosti ilegalne proizvodnje, nabavljanja i stavljanja u promet falsificiranih novčanica, naročito eura i KM. U njih je bio uključen veći broj osoba sa područja BiH i drugih zemalja (Srbija, Crna Gora, Hrvatska). Krivotvorene su najčešće novčanice u apoenima od 100 eura, dok su KM krivotvorene u apoenima od 20 i 50 KM, posebno na području sjeveroistočne Bosne Ove

novčanice su visokog kvaliteta, a prodaju se za iznos od 20-30% nominalne vrijednosti novčanice. Na prostoru BiH u posljednje vrijeme aktualna je prisutnost krivotvorenih kovanica u apoenima od 5 KM.

Pretežnim dijelom radi se o pojedinačnim slučajevima stavljanja u promet falsificiranih novčanica u tržnim centrima, benzinskim pumpama, trgovinama i drugim organizacijama koje posluju gotovinom, koje se otkrivaju odmah ili naknadno pri predaji pazara u banke. Međutim, otkriveno je i nekoliko slučajeva koji ukazuju na znatniji stepen organiziranosti i uvezanosti sa kriminalnim grupama ili na međunarodne relacije ove pojave.

Osim slučajeva falsificiranja novca, u posljednje vrijeme, na teritoriji BiH uočeno je i postojanje organiziranih kriminalnih grupa koje se bave falsificiranjem i zloupotrebom platnih kartica, koje su sve češće sredstvo plaćanja u BiH.

Policijski službenici koji rade po ovoj vrsti kriminala angažirani su u radu koordinacionog tijela WebTag pod pokroviteljstvom EUROPOL-a u kojem učestvuju zemlje Zapadnog Balkana i Turska, kroz koje se vrši razmjena informacija, praćenje novih pojava oblika i sl., te koja pruža mogućnost brzih i efikasnijih provjera za falsificiranje eura.

6. 5. Falsificiranje ličnih dokumenata (falsificiranje ličnih karti, vozačkih dozvola, putnih isprava)

U 2010. godini sigurnosne agencije BiH registrirale su 1.024 krivična djela falsificiranja dokumenata, što je povećanje od 1,46% u odnosu na prethodnu godinu.

Ova krivična djela često su vezana za finansijski i organizirani kriminal.

U 2010. godini pripadnici Granične policije izvršili su privremeno oduzimanje 83 dokumenta za koje se sumnja da su falsificirani, što je smanjenje za 31,97% u odnosu na 2009. godinu.

Broj privremeno oduzetih dokumenata na državnoj granici po vrstama dat je u tabeli:

VRSTA DOKUMENTA	UKUPAN BROJ		
	2010.	2009.	+/- %
Pasoš	11	23	-52,17
Saobraćajna dozvola	7	16	-56,25
Vozačka dozvola	8	8	0,00
Lična karta	12	14	-14,29
Viza	6	7	-14,29
Dozvola boravka	1	1	0,00
Punomoć za vozilo	1	4	-75,00
Osiguranje za vozilo	9	7	28,57
Ostalo	28	42	-33,33
Ukupno	83	122	-31,97

U rubrici ostalo evidentirani su privremeno oduzeti dokumenti kao što su CMR listovi, iskaznice za vozače, licence za vozače i vozila i sl.

Struktura otkrivenih falsificiranih dokumenata na granici sa susjednim zemljama i u zračnom i pomorskom prometu:

FALSIFICIRANI DOKUMENTI				
Otkriveni na granici sa:	Br. slučajeva	Br. dokumenata	Na ulazu u BiH	Na izlazu iz BiH
Hrvatskom	23	27	12	15
Crnom Gorom	9	10	8	2
Srbijom	16	23	8	15
Aerodromi	15	23	13	10
Pomorski prelazi	0	0	0	0
Ukupno	63	83	41	42

Broj otkrivenih falsificiranih dokumenata po državama kojima pripadaju je: Bosna i Hercegovina 30, Srbija 18, Slovenija 9, Italija 7, Bugarska 4, Hrvatska 3 i dr.

Državna agencija za istrage i zaštitu je u 2010. godini aktivno radila na otkrivanju i sprječavanju krivičnih djela krivotvorenja ličnih dokumenata i isprava i podnijela ukupno sedam izvještaja o počinjenom krivičnom djelu protiv 25 osoba kojima je prijavljeno 14 krivičnih djela, te jednu dopunu izvještaja protiv 40 osoba, od čega se pet izvještaja odnosilo na pojedince i grupe koji su zloupotrijebili službeni položaj.

Ministarstvo unutrašnjih poslova Republike Srpske dokumentiralo je 318 krivičnih djela falsificiranje isprave (manje za 0,3%), od kojih se najveći broj odnosi na falsificiranje dokumentacije pri registriranju vozila, zatim diploma i svjedočanstava o završenoj školi, vozačkih dozvola i dr.

Federalno ministarstvo unutrašnjih poslova odnosno Federalna uprava policije, u oblasti krivičnih djela protiv javnog reda i pravnog prometa, u 2010. godini zadokumentirala je 590 krivičnih djela krivotvorenje isprave, više za 50 ili 9,3%.

Policija Brčko Distrikta BiH nastavila je preduzimanje mjera u predmetu „CIPS“ u okviru kojih je Tužilaštvu BiH dostavljen jedan izvještaj i jedna dopuna izvještaja protiv dvije osobe. Takođe su po ranije raspisanim potjernicama od strane drugih policijskih organa u BiH slobode lišene 22 osobe (uglavnom sa područja bivših jugoslovenskih republika koje su na nelegalan način dobile lične dokumenta), u svojstvu osumnjičenih ispitane su 24 osobe, te je povučeno potjernica za 26 osoba. Isto tako, nastavljeno je vršenje analize izuzetih dosijea izdatih ličnih dokumenata, te je zatražena provjera za 178 osoba za koje u dosijeima nedostaju pojedini dokumenti i gdje nema evidentirano koji je službenik Odsjeka za Javni registar vršio obradu predmeta. Odsjeku za Javni registar Vlade dostavljeni su podaci za 131 osobu za koju je utvrđeno da su im na nezakonit način izdati lični dokumenti radi njihovog poništenja, te su dostavljeni podaci za 189 osoba za koje je utvrđeno da ne žive na prijavljenoj adresi.

7. Krivična djela povrede autorskih prava

Ova vrsta krivičnog djela je sve prisutnija u BiH. Odsjeci i timovi SIPA-e za sprječavanje i otkrivanje kriminala su podnijeli u vezi sa krivičnim djelima povrede autorskih prava u 2010. godini, nakon provedenih više operativnih akcija, nadležnim tužilaštvima 47 izvještaja o počinjenom ovom krivičnom djelu protiv 55 osoba i dvije NN osobe i jednu dopunu izvještaja protiv jedne osobe. Izvještajima je prijavljeno 49 krivičnih djela (isto kao i prošle godine). U okviru provedenih operativnih akcija izvršeno je više pretresa i oduzeto oko 111.938 komada nosača slike i zvuka, DVD čitača i pisača, te druge računarske opreme koja je korištena za falsificiranje istih, čija tržišna vrijednost iznosi oko 950.000 KM (u 2009. godini 187.000 komada tržišne vrijednosti oko 845.000 KM).

Ministarstvo unutrašnjih poslova Republike Srpske je u 2010. godini prijavilo tri krivična djela povreda autorskih prava.

8. Krivična djela protiv imovine

Red. Br.	MUP-ovi entiteta i Policija Brčko Distrikta BiH	KD protiv imovine		
		2010.god.	2009.god.	+/-%
1.	MUP-a F BiH	15.011	14.021	7,06
2.	MUP-a RS	6.189	7.303	-15,25
3.	Policija Brčko Distrikta BiH	690	953	-27,59
Ukupno u BiH		21.890	22.277	-1,73

U Bosni i Hercegovini je došlo do smanjenja broja krivičnih djela protiv imovine za 1,73% u odnosu na prethodnu godinu. Među deliktima protiv imovine i dalje su najbrojnije teške krađe, većina ih je sa manjom materijalnom štetom.

Raspoloživa saznanja ukazuju da je ovaj vid kriminala međukantonalni problem, s obzirom da se osobe sa područja jednog kantona pojavljuju kao izvršioci teških krađa na području drugih kantona, a sve češća je i međuentitetska uvezanost izvršilaca ovih krivičnih djela. Objekti napada u vršenju ovih krivičnih djela najčešće su bili stanovi, kuće, trgovački objekti, te motorna vozila. U nekim je otuđivana tehnička roba, prehrambeni proizvodi, nakit, novac, garderoba, automobili, autodijelovi itd.

U većim urbanim sredinama evidentni su slučajevi vršenja teških krađa na naročito opasan ili naročito drzak način. Izvršioci ovih krivičnih djela su prvenstveno višestruki povratnici i maloljetni delikventi, koji, uz prijetnju upotrebe noža i fizičke snage, otuđuju nakit i mobilne telefone, najčešće starijim i maloljetnim osobama na ulici, u stubištima, parkovima i školskim dvorištima.

8. 1. Razbojništva

Iz grupe krivičnih djela organiziranog kriminala, kao jedan od najtežih delikata, **krivična djela razbojništvo i razbojnička krađa u 2010.godini u BiH su u padu za 9,11 %.**

Red. Br.	MUP-ovi entiteta i Policija Brčko Distrikta BiH	KD razbojništva i razbojničke krađe		
		2010.god.	2009.god.	+/%
1.	MUP-a F BiH	812	827	-1,81
2.	MUP-a RS	151	223	-32,28
3.	Policija Brčko Distrikta BiH	14	25	-44
Ukupno u BiH		977	1075	-9,11


U Federaciji BiH rasvijetljeno je 35,7% ovih krivičnih djela registriranih u toku 2010. godine i za njih je prijavljeno 447 osoba, od kojih je 65 maloljetnika i 254 povratnika u vršenju razbojništava, a rasvijetljeno je i 141 krivično djelo ove vrste koje je izvršeno u ranijem periodu, pa je ukupna rasvijetljenost povoljna.

U Republici Srpskoj značajnije je opao broj razbojništava i razbojničkih krađa. Ohrabruje i vrlo povoljan stepen njihove rasvijetljenosti koji je 69,5%, a po nepoznatom izvršiocu 68,3%, što evidentno doprinosi smanjenju ove vrste krivičnih djela. Za izvršenje ovih krivičnih djela tužilaštvima je prijavljeno 165 identificiranih izvršilaca.


Objekti napada i dalje su, pored ostalog, banke i pošte, kao i organizacije i agencije koje posluju gotovim novcem. U Bosni i Hercegovini su u 2010. godini u 24 banke i pošte izvršene oružane razbojničke krađe, te registrirana još četiri pokušaja koja su spriječena intervencijom osiguranja. Odnosno je oko 948.751 KM, što je utvrđeno istragom, a u četiri slučaja neutvrđena suma. (U prethodnoj godini opljačkano je 37 banaka i dvije pošte i odnijeta suma od oko 1,804.609 KM). Istovremeno, u Bosni i Hercegovini registrirana su razbojništva izvršena na 48 benzinskih pumpi, u 169 sportskih kladionica, devet poslovnica Lutrije BiH i u dvije zlatare. I tu je riječ o znatnoj sumi ukradenog novca, a zabrinjavajući je podatak da je stepen rasvijetljenosti ovih razbojništava ispod 50% i pored prisustva internih kamera i alarma.

Na narednim grafikonima dat je višegodišnji statistički izvještaj o broju opljačkanih banaka u BiH i o utvrđenom iznosu opljačkanog novca:

Broj opljačkanih banaka i pošta u BiH



Utvrđeni iznos opljačkanog novca u bankama i poštama u BiH (u milionima KM)



8. 2. Krađa i preprodaja ukradenih vozila

U Bosni i Hercegovini je u 2010. godini došlo do pada krivičnih djela krađe motornih vozila, manje za 90 krađa ili za 5,17 %, čime je nastavljen prošlogodišnji trend smanjenja.

Red. Br.	MUP-ovi entiteta i Policija Brčko Distrikta BiH	KD krađa motornih vozila		
		2010.god.	2009. god.	+/-%
1.	MUP-a F BiH	1409	1420	-0,8
2.	MUP-a RS	219	293	-25,3
3.	Policija Brčko Distrikta BiH	20	25	-20
Ukupno u BiH		1648	1738	-5,17


Smanjenju broja krivičnih djela krađa vozila doprinijele su konstantne mjere policijskih i sigurnosnih agencija u BiH na presijecanju aktivnosti organiziranih kriminalnih grupa koje su se specijalizirale za krađu i preprodaju vozila kao i reketiranje njihovih vlasnika. Zabrinjava, međutim, podatak da je među izvršiocima ovih krađa i preprodaje više od pola povratnika u činjenu istih ili sličnih krivičnih djela.

U Federaciji BiH, od policijskih akcija treba istaći akciju u širem području Zenice, u kojoj je uhapšeno 14 osoba koje su se organizirano bavile krađom automobila i njihovom preprodajom, i u kojoj je pretresom pronađeno sedam ukradenih vozila.

Na području Republike Srpske pronađeno je i vlasnicima vraćeno 89 vozila ili 40,6% od ukupnog broja ukradenih vozila. Po potragama Interpol-a pronađeno je 21 vozilo, a evidentirano je i 13 slučajeva lažnog prijavljivanja krađe vozila radi naplate osiguranja. Zabilježena su i dva slučaja iznude u vezi sa ukradenim vozilima. Pronađeno je i Federalnom MUP-u vraćeno 86 vozila koja su otuđena na području Federacije BiH.

Važno je istaći da su na prostoru BiH i u 2010. godini sprovedene operativne akcije kontrole autootpada sa ciljem otkrivanja i dokumentiranja krivičnih djela i pronalaska ukradenih automobila i presijecanja sprege kriminalnih grupa koje krađu vozila, isporučuju ih autootpadima, gdje se rastavljaju i prodaju u dijelovima.

Na narednom grafikonu dati su uporedni podaci o broju krivičnih djela krađa vozila u BiH za period 2007.-2010. godina:



9. Organizirane kriminalne grupe i međunarodna policijska saradnja

Najveći broj organiziranih kriminalnih grupa u Bosni i Hercegovini bavi se ilegalnom trgovinom droge, krađom i preprodajom ukradenih automobila i krijumčarenjem ljudi kao najunosnijim kriminalnim djelatnostima. Pored toga, prisutno je krijumčarenje vatrenog oružja i municije i njegova prodaja na ilegalnom tržištu te organizirano falsificiranje novca. Jedan broj pripadnika ovih grupa bavi se naručenim ubistvima, ucjenama, otmicama i iznudama, uz napomenu da se broj organiziranih kriminalnih grupa mijenja **jer je stepen obnavljanja procesuiranih grupa i lanaca velik, s obzirom na sve veći procenat učešća povratnika**. Riječ je o kriminalnim grupama koje su dio međunarodnih lanaca i čiji je stepen organiziranosti izrazito velik i koje imaju iskristaliziranu organizacijsku strukturu: od organizatora, saizvršilaca, saučesnika do pomagača. Uočena je tendencija povećanja krivičnih djela sa obilježjima organiziranog kriminala u oblasti privrednog kriminala.

U 2010. godini u BiH je brojnim policijskim akcijama presječena djelatnost 27 raznih kriminalnih grupa (od tri i više osoba). Postojeće indicije upućuju na pretpostavku da djelatnost ovih grupa nije pojedinačna i neplanska već da iza njihove kriminalne djelatnosti ipak stoje uvezana ilegalna tržišta droge, krijumčarenog oružja, seksualnog iskorištavanja odnosno prostitucije i krijumčarenja ljudi, sa svim svojim cikličnim periodima „ponude i potražnje“, te da su i ostali oblici organiziranog kriminala (prije svega krađe automobila te oružane pljačke banaka i benzinskih pumpi, zbog velikog stepena organiziranosti i planiranja na prostoru BiH) na izvjestan način uvezane i planirane od strane „kreatora“ i „planera“ takvog ilegalnog, kriminalnog „tržišta“, što podrazumijeva da treba tragati i za samim vrhom organiziranog kriminala koji i ne mora biti u Bosni i Hercegovini.

Organizirani kriminal je, dakle, davno prestao biti ograničen samo na određene zemlje, te kao globalni problem, zahtijeva dobro osmišljen odgovor. Na osnovu urađenih procjena prijetnji organiziranog kriminala za regiju Jugoistočne Evrope (OKTA SEE), policije zemalja u Regionu su pripremile i realizirale više zajedničkih akcija na suzbijanju djelovanja razgranatih međunarodnih organiziranih kriminalnih grupa. **Sve ove akcije pokazale su da uspješna borba protiv organiziranog kriminala nije moguća bez visokog nivoa povjerenja i profesionalne saradnje na međunarodnom ali i nivou unutar Bosne i Hercegovine.**

10. Javni red i mir

Stanje javnog reda i mira u Bosni i Hercegovini **je u odnosu na isti period prošle godine nepovoljnije. Povećan je broj prekršaja za 2,42 %.**

Red. Br.	MUP-ovi entiteta i Policija Brčko Distrikta BiH	PREKRŠAJI		
		2010.	2009.	+/-%
1.	MUP-a F BiH	21.790	20.632	5,6
2.	MUP-a RS	9.275	9.591	-3,29
3.	Policija Brčko Distrikta BiH	245	330	-25,75
4.	Granična policija BiH	24	40	-40
Ukupno u BiH		31.334	30.593	2,42

U 2010. godini u BiH počinjena su 31.334 prekršaja u oblasti javnog reda i mira od strane 29.438 osoba.

Od prekršaja iz zakona o javnom redu i miru najbrojnije su tuče, zatim naročito drsko ponašanje, prosjačenje, odbijanje naređenja i omalovažavanje policijskih službenika, svađa, vika i nepristojno ponašanje, neovlaštena upotreba oružja, paljenje petardi, uživanje opojne droge na javnom mjestu, služenje alkohola maloljetnicima i dr.

Najveći broj prekršaja registriran je na ulici i drugim otvorenim prostorima, zatim ugostiteljskim objektima, školama i školskim dvorištima, sportskim stadionima i dvoranama, vozilima javnog saobraćaja, te ostalim mjestima.

Posljedice u narušavanju javnog reda i mira u 2010. godini su 15 teže i 2.847 lakše povrijeđenih osoba. Prilikom intervencija jedan pripadnik policije je poginuo, 11 policajaca teže i 149 lakše povrijeđeno, a protiv počinilaca podneseni su službeni izvještaji o počinjenom krivičnom djelu.

11. Mjere i radnje u periodu narednih šest mjeseci 2011. godine

Razmotriti i usvojiti Prijedlog zakona o izmjenama i dopunama Zakona o sprječavanju i suzbijanju zloupotrebe opojnih droga, u cilju poboljšanja postojećih zakonskih rješenja kao i Prijedlog pravilnika o čuvanju i uništavanju oduzetih opojnih droga.

Uraditi Prijedlog zakona o prevenciji i borbi protiv terorizma u BiH; izraditi nacрте i dati na usvajanje podzakonske akte vezane za Zakon o sprječavanju pranja novca i finansiranje terorističkih aktivnosti u BiH.

Usvojiti izmjene i dopune Zakona o zaštiti tajnih podataka.

Postići kompromisnu političku usaglašenost stavova oko Prijedloga zakona o oružju i Prijedloga zakona o zaštitarskim firmama, ili bar harmonizaciju postojećih entitetskih zakona.

Donijeti Pravilnik o unutrašnjoj organizaciji Agencije za prevenciju korupcije i koordinaciju borbe protiv korupcije; nastaviti implementaciju GREKO preporuka;

Izraditi i usvojiti Odluku Vijeća ministara BiH o dostavi statistika kriminaliteta u cilju unapređenja razmjene podataka i ukupne informiranosti u sigurnosnom sektoru.

U okviru bilateralne međunarodne saradnje odnosno zaključivanja međunarodnih ugovora iz nadležnosti Ministarstva sigurnosti BiH, pripremiti nacрте sedam međunarodnih ugovora i sporazuma i dati ih u proceduru usvajanja; a u okviru realizacije evroatlantskih integracija nastaviti zaključivanje sigurnosnih aranžmana na osnovu prijekata IPA(IPA) i TAIKS (TAIX).